


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-78	An-Naba'	40	2	Makkiyyah	Ke-80	6





### **Zaman Diturunkan**

Surah an-Naba' diturunkan pada peringkat ke-2 kehidupan Rasulullah s.a.w. di Mekah antara tahun ke-4 dan ke-5 Kenabian, ketika itu da'wah secara terbuka telah pun dilancarkan. Pada ketika itu masyarakat Quraisy mula berselisih pendapat tentang hari kiamat sama ada ia akan berlaku atau tidak. Menerusi surah ini, 'aqidah tentang kewujudan hari kiamat diperteguhkan.

### **Kelebihan Surah An-Naba'**

Rasulullah s.a.w. bersabda: {عَمَّ يَتَسَاءَلُونَ} و {إِذَا الشَّمْسُ كُوِّرَتْ} Maksudnya: "Surah Hud, al-Waqi'ah, al-Mursalaat, عَمَّ يَتَسَاءَلُونَ (Surah an-Naba') dan إِذَا الشَّمْسُ كُوِّرَتْ (Surah at-Takwir) telah membuatkan aku beruban (menjadi tua)" – Jami' At-Tirmizi, Kitab Tafsir, Bab Surah al-Waqi'ah, Hadits ٣٢٩٧. Ia adalah satu hadits sahih.

### **Perkaitan Surah An-Naba' Dengan Surah Sebelum Dan Selepasnya**

Di dalam Surah al-Mursalaat sebelum ini berkali-kali dinyatakan bahawa مُكَذِّبِينَ (orang-orang yang mendustakan adanya hari kiamat) pasti akan binasa dan musnah. Di dalam Surah an-Naba' ini pula dikatakan manusia yang tidak percaya kepada hari kiamat itu adalah الطَّاغِينَ (orang-orang yang derhaka dan melampaui batas). Orang-orang yang percaya kepada hari kemudian pula dan mengikat hidupnya dengan ikatan-ikatan dan peraturan-peraturan agama berhak mendapat syurga dan mereka digelarkan sebagai الْمُتَّقِينَ.

### **Beberapa Kata Kunci Dan Tema Utama Surah**

1. Di dalam ayat ke-3 surah ini disebutkan هُم فِيهِ مُخْتَلِفُونَ iaitu hari yang diperselisihkan oleh mereka. Perselisihan mereka terjawab melalui ayat ke-39 iaitu ذَلِكَ الْيَوْمُ الْحَقُّ (itulah hari yang benar-benar akan berlaku).
2. Ayat ke-7 menyatakan bahawa Allah s.w.t. memasakkan gunung-ganang pada bumi untuk menetapkan dan mengukuhkannya وَأَلْجَبَالَ أَوْتَادًا, tetapi di dalam ayat ke-20 dikatakan pada hari kiamat nanti gunung-gunung itu akan menjadi fatamorgana dan akan bergerak-gerak وَسُيِّرَتِ الْجِبَالُ فَكَانَتْ سَرَابًا.
3. Di dalam ayat ke-12 dinyatakan bahawa Allah s.w.t. telah membina 7 langit yang teguh dan kukuh di atas kita وَبَنَيْنَا فَوْقَكُمْ سَبْعًا شِدَادًا, tetapi di dalam ayat ke-19 dinyatakan pada hari kiamat nanti langit-langit itu akan dibuka sehingga ia menjadi pintu-pintu وَفُتِحَتِ السَّمَاءُ فَكَانَتْ أَبْوَابًا.
4. Di dalam surah ini terdapat perbandingan di antara golongan الْمُتَّقِينَ dan الطَّاغِينَ. Balasan kepada mereka tidak sama. Orang yang hidup dengan takut kepada hari kiamat adalah الْمُتَّقِينَ dan orang yang hidup dengan langsung tidak berasa takut kepada hari kiamat adalah orang الطَّاغِينَ (penderhaka).